

清史列傳

冊十



清史列傳 卷十一

大臣畫一傳檔正編八

費揚古

費揚古滿洲正白旗人姓棟鄂氏內大臣鄂碩之子也世祖章皇帝順治十五年襲父三等伯爵聖祖仁皇帝康熙十三年隨安親王岳樂率兵赴江西討逆藩吳三桂委署營總時賊將黃乃忠糾賊萬餘自長沙犯袁州費揚古與副都統沃赫總兵趙應奎等擊敗之擒僞官童聖功復萬載縣城十五年擊走賊將夏國相於萍鄉毀寨十二進圍長沙屢戰皆捷十八年敗賊將吳國貴於武岡凱旋紀功擢領侍衛內大臣兼火器營總管列議政大臣二十八年命頒賚喀爾喀左翼土謝圖汗二十九年上以噶爾丹劫掠喀爾喀又數擾我邊境授裕親王福全撫遠大將軍費揚古往科爾沁調兵隨征參贊軍事是年八月擊敗噶爾丹於烏蘭布通三十二年命費揚古爲安北將軍駐歸化城三十三年五月噶爾丹使人至歸化城言欲入貢費揚古偵其踵至者男婦幾二千人遣兵迎問且止之馳疏請旨上

知噶爾丹陽爲修好潛蓄窺探意命侍郎滿丕諭責其使遣之還七月聞噶爾丹將逼圖拉詔費揚古同右衛將軍希福率兵往禦希福請益兵上責希福遇事疑沮令勿偕往諭大學士等曰費揚古勳舊大臣今駐防歸化城軍民皆心服於此事無不能辦也尋以圖拉無警慮噶爾丹將趨歸化城詔費揚古旋師三十四年七月噶爾丹至哈密費揚古率兵往禦噶爾丹由圖拉河西竄去十月授右衛將軍仍兼管歸化城將軍事十一月疏言聞噶爾丹踞巴顏烏蘭距歸化城約二千里宜集兵運糧於來年二月往剿詔授爲撫遠大將軍召入覲授方略三十五年二月以黑龍江將軍薩卜素率兵出東路命費揚古集兵歸化城出西路振武將軍孫思克率甘肅兵西安將軍博齊率陝西兵會期並進上親統大軍出中路四月費揚古至察罕和碩噶爾丹驅賊衆趨克魯倫河東路兵未至科圖而上已由科圖進次什巴爾台近壓賊境五月三日費揚古師至圖拉疏言西路有草之地爲賊所焚我軍每迂道秣馬又遇雨糧運遲滯師行七十餘日人困馬疲乞上緩軍以待會噶爾丹望見御營於克魯倫河大驚奔竄上密諭費揚古邀擊親督大軍躡追至拖諾山駐蹕費揚古聞噶爾丹遁歸特呼勒濟遂遣前鋒統領碩岱副

都統阿南達阿迪等率兵先往挑戰且戰且卻誘至昭莫多復分兵三隊東則滿洲漢軍及察哈爾兵倚山列陣西則右衛大同及喀爾喀兵沿河列陣而使將軍孫思克率綠旗兵居中並遵上方略令官兵皆步戰俟賊勢披靡乃上馬衝擊時噶爾丹率衆幾萬人我軍分隊迎戰自未至酉斬級二千餘賊皆潰奔乘夜追逐三十餘里生擒數百人獲馬駝牛羊廬帳器械無算噶爾丹引數騎遠竄費揚古令阿南達賚奏馳報御營召詢其詳阿南達奏曰噶爾丹聞上親征心膽俱裂且不虞我兵絕其去路突然交戰擒斬過半傷斃山谷者相枕藉噶爾丹之妻亦受戮其部衆來降者又二千餘人費揚古恐語涉矜張故疏內約略言之上乃班師留費揚古駐守科圖七月奉詔由科圖移駐喀爾喀郡王善巴遊牧地甫至噶爾丹潛使台吉丹濟拉率千五百人來掠喀爾喀牲畜糗糧費揚古遣副都統祖良璧禦卻之追擊至翁錦賊敗遁費揚古尋以馬疲移軍喀喇穆倫會噶爾丹使其宰桑格類固英等來請納款上再幸塞外駐蹕棟斯拉命費揚古馳赴黃河西界行在入對諭及昭莫多之戰勢如破竹實爲可嘉費揚古奏曰軍中機務皆遵上密諭以翼成功西路官兵聞聖駕先臨克魯倫河無不踴躍奮勉噶爾丹之敗衄

皆睿謨神武震以軍威追之窮蹙所致臣不能生擒以獻罪也上曰觀來降台吉等及格類固英之言噶爾丹窮蹙是實朕意不忍悉加屠戮欲招降其衆撫而治之費揚古奏曰聖意實非臣等愚昧所能測真天地好生之仁也翌日賜御佩橐韃弓矢遣還軍營二十六年正月阿南達自肅州奏報哈密回人擒獻噶爾丹之子塞卜騰巴爾珠爾等上以其疏錄示費揚古賜胙肉鹿尾關東魚等物諭曰時當上元令節衆蒙古及投誠厄魯特齊集暢春園適阿南達疏至衆皆喜悅爾獨居邊塞不得在朕左右殊深軫念故以阿南達疏示知並賜物問爾無恙卽如與爾相見也二月上幸寧夏詔費揚古密籌進剿噶爾丹費揚古疏請罷大將軍任隨領兵將軍出征上不允所請令便宜調遣兵馬以行上由黃河西岸駐蹕達拉布隆頒賜上駟院馬五十駱駝十費揚古進次薩奇爾巴勒哈遜時厄魯特部衆降者相繼丹濟拉亦遣人納款言噶爾丹已死欲攜骸骨及其子女並率三百戶來歸費揚古以聞上回鑾留費揚古駐師察罕諾爾以待丹濟拉六月丹濟拉至哈密費揚古有疾詔昭武將軍馬思喀代統其兵費揚古還京仍任領侍衛內大臣晉封一等公費揚古以噶爾丹雖死非係生擒疏辭封爵得旨宜遵成命毋固

辭諭大學士等曰塞外情形不可臆度必身歷其境乃有確見昔朕欲親征噶爾丹衆皆不欲惟費揚古密抒謀略與朕意合遂悉以西路官兵令其統領進兵道路遼遠兼乏水草乃全無顧慮直抵昭莫多奮揚軍威俾奸狡積寇挫衄大敗累年以來統兵諸將未有能過之者又諭曰朕屢出征知爲將甚難固不可急亦不可緩費揚古惟相機調遣緩急合宜是以濟事四十年六月十六日幸索約勒濟費揚古扈從中途疾作上停蹕一日親往視疾賜御帳蟒緞鞍馬等物銀五千兩遣內大臣侍衛等護送還家尋卒賜祭葬如典禮諡襄壯以其子辰泰襲一等侯兼一雲騎尉世宗憲皇帝雍正十年入祀賢良祠

孫思克

孫思克漢軍正白旗人三等男孫成功次子初任王府護衛世祖章皇帝順治八年二月管佐領六月授刑部理事官十一年六月遷參領十三年考滿廕一子入監尋隨大軍由湖南進征貴州雲南屢立戰功聖祖仁皇帝康熙二年正月擢甘肅總兵官五年三月同提督張勇疏言厄魯特蒙古僻處海隅雖通西藏亦荒徼絕塞非有肥饒地土資生朝廷曲示招徠准開市口貿易且以境內數十萬之番

族令每年輸納駝馬牛羊與彼爲厄魯特蒙古者理應感戴皇上鈐東部落各安邊境乃墨爾根台吉等狼心不改鷹眼未化蟻聚蜂屯於祁連山上縱牧內地之大草灘去冬不遵撫慰抗拒於定羌廟爲官兵擊退稍挫其鋒猶不悛改狂肆愈甚聲言糾合部落一股直入河州臨洮鞏昌一股進逼西寧一股分犯涼州狡謀叵測宜迅速創懲方可議修築而嚴固守得旨下廷臣密議以兵端不可輕動令嚴防邊境仍撫恤番人以和其心於是思克偕張勇修築邊牆自扁都口西水關起至嘉峪關止六年八月內地往牧黃城兒大草灘各處之厄魯特蒙古盡數徙去思克至南山各隘相度衝險撥兵固禦總督盧崇峻疏聞下部知之十三年六月諭獎效力邊疆有年下部議加銜右都督是冬平涼提督王輔臣叛應吳三桂臨鞏諸郡相繼從逆蘭州危急思克遣遊擊劉衍等移兵協防自統兵進攻苦水洋值蘭州已失守乃駐河西尋回涼州十四年五月疏言前因督臣哈占定議南北兩路兵同時進剿將軍張勇總兵王進寶等從金城關渡河規復蘭州思克自涼州領標兵由阿壩紅水蘆塘索橋人跡不到之草地結筏渡河規復靖遠一路幸賴天威遐播靖遠周圍二百里城堡皆已納款正擬趨固原會大兵於平涼不

料西海蒙古墨爾根台吉等已從山口入內地與官兵拒敵副將陳達傷亡臣留
參將劉選勝等守靖遠由草地渡河回涼州以保河西根本重地墨爾根台吉引
衆出口而甘州所屬之高臺與紅崖梨園等堡有黃番頭目入口搶掠合數千餘
騎攻圍暖泉順德諸堡臣卽自涼赴甘番族乃遠竄因將軍張勇約期會剿王輔
臣復渡河而東因草地往來兵丁勞苦十倍他鎮乞恩加犒賞得旨往來防剿具
見忠蓋兵丁各加犒賞閏五月同張勇等圍鞏昌時定西大將軍貝勒洞鄂圍秦
州城中賊屢出犯其逆黨自四川至者結寨秦州南山上日益猖獗洞鄂檄思克
率兵二千駐秦州西賊勢乃窮僞總兵陳萬策僞道馬肇升赴思克營乞降僞總
兵巴三綱遁遂復秦州南山賊潰竄思克同振武將軍佛尼勒等追擊於閻關敗
之乘勝克禮縣復敗賊於西和奪門入斬僞官三十清水伏羌等縣皆復乃赴鞏
昌會剿遣降將陳萬策等入城曉諭僞道陳台孫總兵陳可等以鞏昌十七州縣
降河東悉定八月會剿平涼思克由靜寧隆德進擊走賊將李國樑陣斬賊兵五
百餘生擒僞守備一千總二復靖寧州進次華亭僞副將高鼎率將弁二十八兵
一千餘迎降遂抵平涼與大軍合十五年三月貝勒洞鄂奏言大軍圍平涼半載

賊屢出犯思克標兵徒步當先敗賊於南山者四敗僞總兵蔡元於城北者四又九處設伏敗賊於南門僞總兵文姓引賊二千掩襲掘壕阻思克軍揮兵急擊賊遂退復逼者三俱敗之剿涇州白起寨僞副將李茂思克先至寨下遣領旗李錦先登擒李茂斬賊數十又敗賊於南山甲子峪及馬營子麻布嶺諸處宜酌示鼓勵紀功敍錄五月隨撫遠大將軍圖海破賊於虎山墩王輔臣窮蹙乞降思克還涼州八月諭部臣曰自逆賊變亂以來奸徒附和侵擾地方大兵未集人心不無動搖張勇王進寶孫思克一聞蘭州之變卽率兵剿殺賊衆收復城邑其功甚大及大兵攻取平涼復同心協力展布謀猷兼以訓練士卒忠義素孚故能身先行陣所向克捷朕甚嘉之於軍功議敍之外應從優加恩孫思克陞爲涼州提督並授一等輕車都尉世職十月疏言全秦底定仰仗天威臣何功可錄蒙皇上溢格優陞復授世職臣卽粉身碎骨萬不敢辭五月虎山墩之戰隨大將軍圖海相度地形併偵通固原路徑賊伏兵萬餘猝起來犯臣率領隊兵奮戰追擊十餘里雖敗賊衆而賊刀砍臣右臂傷筋及骨迄今閱五月已成殘疾乞假解任回旗得旨卿久鎮巖疆剿除賊寇奮勇克敵屢建戰功新簡提督正資料理不必求罷十六

年四月彙敘前此軍功晉三等男時噶爾丹侵西北諸蒙古其濟農等爲所敗突
入沿邊寨內擾居民思克同張勇以兵驅逐乃徙去十八年七月上敕圖海調思
克與提督趙良棟等勦賊漢中興安圖海奏九月初旬四路進發思克與將軍畢
力克圖由略陽進會有詔因京師地震令內外大臣各抒所見思克疏言漢中興
安皆崇山疊嶺勢險路紆逆賊盤踞有年又創斷各路要口我兵未能長驅直入
賊兵爬山越嶺如履平地稔知小路曲徑潛躡我後以絕餉道爲害滋甚大將軍
圖海定議四路進兵雖分賊勢終憂兵單綠旗兵每人止有一馬常需馱載甲冑
器械馬料不足羸瘦甚多步兵背負棉甲乾糧不皆強壯惟滿洲勁旅堪恃第爲
數亦無多若各路調取又恐秦省三邊地逼番夷秋高馬肥乘機思逞不若今秋
暫緩進兵揀選各營強壯餉秣馬匹俟來春二三月間塞外草尙未生水泉尙涸
番夷不敢內犯之時多調邊兵以資戰守秦地大半皆山土瘠民貧不產杭稻所
種惟麥豆之屬尙有捐納一項稍裕軍需今已停止專事採買用民負載馱運雇
賃之價數倍於應輸之賦各路需餉甚多山徑狹隘輓運維艱或照向年捐例轉
輸協濟亦宜緩期熟計俾士馬得以飽騰況出征官兵聞京師地震傾壞房屋壓

斃人口各有內顧之憂俟來春人心稍定兵糧俱足再議進兵未爲晚也疏入上命學士拉隆禮至涼州宣諭詰問曰陝西綠旗兵較之各省曩推精銳賊能跋涉山嶺我兵何獨不能漢中興安久爲內地滿漢大兵經行熟悉孫思克何得視同絕域荒誕其辭凡將帥用兵前爲衝鋒後顧餉道自有一定機宜倘以賊間道潛來斷絕餉道爲憂怯懦不前則永無破賊之日矣各省綠旗兵皆祇給一馬越境征剿粵東粵西閩楚諸處今又進定滇黔較之平定境內漢興勞逸何如耶凡將軍提鎮募兵時必選精壯毋得濫收充數定例嚴明如果兵非強壯難以應用則孫思克平日所司何事滿洲兵在陝西者亦不少且有將軍圖海籌畫周詳何得妄稱單弱正值秋成涼爽各處賊寇大敗震驚之餘不速行平蕩反欲於來春青黃不接之時進取設或二三月間進取之後四五月間番夷馬肥思逞又將若之何粵東粵西山嶺亦多何曾預備糧餉官兵豈有止食稻米不食他粟之理陝西數年以來未曾勞民轉運漢興雖多險阻非隔省可比今恐輓運累民來春又誰爲輓運耶當逆賊敗遁之時急令進兵者正爲早定地方以安百姓耳今以輓運維艱請開事例爲詞其規避進兵明甚八旗官兵世受渥恩不特房屋傾圮無

足重輕卽赴湯蹈火誼亦難辭何得妄言人情憂慮孫思克封疆大臣前者陝西境內淪陷卽應議處念同大軍進剿宥過計功加不次之擢給世襲之官當捐軀報國自請破賊安疆乃身任提督統轄全師不思奮力前進反煽惑人心飾詞妄奏深負朕恩速行詰取供詞思克乃自引罪拉隆禮還奏得旨俟事平日再議十一月思克與畢力克圖敗賊衆於階州文縣成縣進駐沔縣詔思克還涼州尋以總督哈占請移駐莊浪防守河東河西二十年三月慶陽賊渠耿飛倡亂糾叛番達爾嘉濟農等犯河州思克與張勇剿平之二十二年四月追論前奏緩進兵罪革三等男爵及提督仍留總兵任二十三年六月遷甘肅提督二十八年三月北套生番犯內地掠錫喇偉古爾番族思克督兵截阻斬獲甚衆二十九年十月出使西域學士達瑚郎中桑格歸至嘉峪關外爲西海阿奇羅卜藏所劫思克聞報卽遣遊擊朱應祥計賺其宰桑質於關內始反我使臣別遣副將潘育龍遊擊韓成等搗其巢穴斬馘四百餘阿奇羅卜藏遁復遣人赴西海詰問各台吉責償所掠物各台吉懼罄阿奇羅卜藏所有以償思克奏請免其窮治諭嘉盡心籌畫區處合宜如所請行三十年二月疏言肅州一協去甘州五百里涼州一千里極邊

之地外逼西海北套哈密諸部內則番族插帳與民雜處噶爾丹巢穴離邊月餘程其姪策妄阿喇布坦現在西套駐牧雖叔姪爲讐恐將來復合有侵奪西海之舉嘉峪關外係其必由之路所設副將威望不尊兵馬不滿一千不足以資控禦調兵接應緩不濟急不可不作先事未然之防請設總兵一員兵三千以固邊圉庶可漸消窺伺又甘肅地瘠民貧一切布種收穫與腹地迥別一年一收縱遇豐年輸將國賦之外僅贍八口並無蓋藏本地兵馬糧料不敷供支節年折價已苦無處糴買萬一征調雲屯何以接濟宜於河西要地屯積糧草以備戰守但本地無糧可買輓運又恐勞民惟捐輸是賴而本地富庶之家有限請無論本省別省官民一例捐納加級紀錄職監俟邊儲稍充卽行停止九卿議從之三十一年三月詔嘉久著勞績加太子少保予騎都尉世職五月疏報遣總兵潘育龍等追來降復叛之番衆於庫列圖嶺斬級四十餘擒百二十人請將叛首齊奇克正法宥其從人妻子解京上免齊奇克死令安插內地十一月自陳乞休優旨慰留加振武將軍銜三十二年二月命內大臣耶岱領京營兵至寧夏同思克駐防卽以思克爲參贊探噶爾丹聲息三十三年正月疏報巴圖爾額爾克濟農之弟博濟於

三十年間叛逃復帶部落窺邊經臣遣兵同總兵柯彩出邊擊敗今聞其兄蒙恩安插賀蘭山并以博濟逃後被獲人口發往收養自悔前罪率所屬男婦百餘來投詔與巴圖爾額爾克濟農同駐牧三十五年二月上親征噶爾丹由中路命撫遠大將軍費揚古由西路進思克率陝西兵出寧夏至翁金地與費揚古會五月上駐蹕克魯倫河噶爾丹聞駕親臨倉皇遁去費揚古邀擊之於昭莫多思克率綠旗兵居中與東西二軍併力迎戰自未至酉斬級俘獲無算追逐三十餘里噶爾丹引數騎遠竄捷奏至奉諭褒獎召赴京命侍衛迎勞賜袍褂帽靴等物並御製詩筵有鷹揚資遠略宿望在西陲之句入覲暢春園賜御書綏懷堂額及端罩四團龍補服孔雀翎朝帽朝衣朝珠鞍馬並給隨帶官兵糧料命赴肅州駐兵探噶爾丹往哈密聲息三十七年敕昭莫多戰功加一雲騎尉三十九年二月以病乞休遣御醫及兵部官往視仍命留任調養是月卒詔從優議卹贈太子太保賜祭葬如例諡襄武七月櫬還命皇長子前往奠醊賜鞍馬銀二千兩諭廷臣曰聞孫思克喪回時自甘州至潼關沿途軍民無不號泣相送若平昔居官不善何以得此誠可謂將軍矣復諭兵部曰孫思克謀勇素裕居官甚優久鎮巖疆允稱良

將給還前所革世職部議併爲一等男加一雲騎尉以其子承運襲世宗憲皇帝雍正十年入祀賢良祠今上乾隆三十二年以思克當吳三桂反叛及噶爾丹犯邊時懋著勞績其一等男爵詔予世襲罔替

珠滿

珠滿滿洲正白旗人姓瓜爾佳氏先世居烏拉祖多和倫國初來歸從征錦州廣寧有功授雲騎尉次子額赫瑪瑚以三等侍衛隨安南將軍宗室洛託征海賊鄭成功進攻廈門力戰陣亡聖祖仁皇帝康熙二年正月卹贈雲騎尉無子珠滿其兄子也襲其職十三年署參領隨大軍征江西時逆藩耿精忠叛應吳三桂遣賊黨犯南康珠滿隨征南將軍尼雅翰等擊敗之又敗僞總兵莊姓朱姓於沔津十五年隨大軍規復吉安破賊衆於惶恐灘十六年三月隨鎮南將軍莽依圖往廣東入韶州吳逆遣僞將軍馬寶等渡河來犯大軍分隊拒之珠滿由右翼奮戰連破賊營馬寶等突圍宵遁十八年六月隨莽依圖進剿廣西由橫州至南寧擊賊將吳世琮於新村西山大破之遂解南寧之圍十九年六月隨莽依圖討叛賊馬承蔭於柳州路經陶登敗其黨范齊韓詹仰等援兵是冬隨征南大將軍賴塔征

雲南二十年正月擊賊將何繼祖王宏勳等於石門坎奪其隘口賊退據黃草壩
二月克之遂進征雲南城陣斬僞將軍胡國柄等七月復隨都統希福等追擊賊
將馬寶巴養元於烏木山賊潰遁乞降是年雲南平凱旋二十五年七月敘功晉
騎都尉兼一雲騎尉二十七年六月授三等侍衛二十九年三月授護軍參領三
十年正月兼管火器營事六月調前鋒參領三十六年六月擢荊州副都統三十
九年十二月奉命同副都統阿濟禮率荊州兵二千會剿四川逆蠻比至都統滿
丕提督唐希順等已復打箭鑪遂駐師鴉隴江防守四十一年六月撤兵還荊州
九月鎮守紅苗作亂上命尙書錫勒達副都統圖師海徐九如統師剿撫諭以珠
滿久於用兵凡事與商酌而行十一月撫降三百一寨惟天星一寨仍負固錫勒
達與提督俞益謨等分四路追剿珠滿領兵協應攻克燕蘆寨斬戮無算餘寨悉
平敘功一級四十五年二月擢江寧將軍四十六年三月上南巡至江寧賜紫貂
冠服及良馬是年卒於官賜祭葬如例明年吏部請以其子撒木貝襲騎都尉兼
一雲騎尉得旨珠滿人才壯健行閒勞績茂著人所共知自簡用將軍倚畀正切
委任未久忽聞奄逝深可憫惻所有世職著再加一雲騎尉授爲三等輕車都尉

予伊子撒木貝承襲

碩岱

碩岱滿洲正白旗人姓喜塔喇氏先世居尼雅滿山有昂郭都哩巴顏者當太祖高皇帝時來歸碩岱其五世孫也世祖高皇帝順治六年以二等侍衛兼參領隨睿親王多爾袞討大同叛鎮姜瓖復渾源州九年三月上幸南苑碩岱與一等伯巴什泰及蒙古侍衛索尼並從索尼猝拔刀殺巴什泰碩岱卽舉所執長槍擊索尼立仆擒之置諸法上嘉其勇敢予騎都尉兼一雲騎尉世職十三年授護軍參領十五年隨征南將軍卓卜特由廣西征貴州時明桂王朱由榔之將李定國李成蛟等分踞黔西要隘碩岱率兵渡盤江擊敗成蛟於涼水井復擊敗定國於雙河口十六年大軍攻雲南追剿定國至騰越碩岱遇伏於磨盤山力戰克捷十八年山東土賊于七踞棲霞縣之鉅嶠山作亂碩岱隨靖東將軍濟什哈往剿斬獲賊黨無算于七竄入海聖祖仁皇帝康熙六年擢前鋒統領十三年冬逆藩吳三桂反上以荊州地當衝要命碩岱領前鋒兵先諸軍進發固守荊州俟諸軍繼至再進據常德以遏賊勢十三年正月碩岱至荊州二月賊陷常德及澧州犯宜昌